


A Monthly Christian Magazine

AN ORGAN OF THE ZOU PRESBYTERIAN CHURCH SYNOD

Khristian Tangkou

Vol. 54 || No. 10

October, 2018



Editor: Rev. Stephen Chinzathang

Synod Kumpuon: **"Pasian thuguh kem"** (I Korin 4:1)

Khristian Tangkou

Vol. No. 54 || Issue No. 10 || October, 2018

Editorial Board

Editor : Rev. Stephen Chinzathang - 9863042789
ct_stephen@yahoo.com

Joint Editor : Rev. Khamchinkhai - 8730933744

Cir. Manager : Upa Jamsianmung - 9862086615
sianmung@rediffmail.com

Bus. Manager : Upa Kamgenpau - 8974612937
Shie T. Ginzahau - 8974438842

Cont. Editors : Upa Khupsuankham - 9856406454
Rev. Awnkhankhup - 9862828921
Rev. Dr. Hangpi Maunlun - 9862910875
Rev. Kaimuanlal - 9862923960

ZOU SYNOD ULIENTE

• Moderator:

Rev. Awnkhankhup

• Moderator Elect:

Rev. Dr. Hangpi Maunlun

• Secretary (Sr):

Upa Er. Thangchinmang

• Secretary (Jr):

Upa Liensuonkap

• Treasurer:

Upa Chinsuanthang

• Statistician:

Upa Khaihenthang

• Executive Secretaries:

Rev. Stephen Chinzathang

Rev. Khamchinkhai

A sung thu

- Editorial..... 01
- Thu tuomtuom & Thumpi ding..... 02
- September Sumpi sungte..... 05
- Pasion thuguh kem 06
- Guolzawlina nah 08
- Zounaw..... 10
- Pasion Hattuum 13
- Tehsete tung a sil hoi..... 18
- Na pasal va han inlen 18
- Ordain Suunna..... 23
- ZPWF Cumlumn 24

Copies - 1200

AMAN

Kumkhat ah	- ₹	100.00
Post ah	- ₹	200.00
Copy khat ah	- ₹	10.00
Life Member Fee	- ₹	1,000.00
Patron Member Fee	- ₹	2,000.00
Memorial gift	- ₹	2,000.00

Thusuo zosie Editor leh Zou Synod ngaidan ahi kimsih a, a suotute'n maw a kipuoh chiet ding uhi.

Thusuo dingte Editor kung a pieh ding ahi.



Editorial

Mangpa umpina leh mapuina tangtou jel in Sepguol Ha zangzou in tukum 2018 Year Planner dungzui in District PYF, PWF leh District Khawmpi thupi tuomtuom nei a mang ding ihi ua, vaihawmna leh Pasion Biehna hunte Mangpa Pasion mapuina toh tahsa Hagau a mimal chin in guoljawlna itanna uh hileh chi i thumna uh ahi.

Sepguol Ha iman dan uh i Hattuum Unit a tam zawten innsuon chin vena nei in akhen in nitah chin Biehinn kaina anei ihi ua, i Hattuum chin ten iman dan bang dungzui ua, i phattuompi uh zong iki nem uhi. Sepguol kumchin a ina zat zing uh ahing kipat dan tomkim in tahlang va ui. Kum 1918, 9 March in Aizawl Hattuum Committee in gingloute kung a Khantanhoi genpina ha khat pumlum nei ding angaituo ua, tuomi kum in ahun ding in June ha aguot ua, tami hunlai in Presbytery in kum khat in nivei khawmpi anei hi. Kum 1918 October ha in Hmunmeltha Presbytery in Kum 1919 September ha a Sepguol nei sutzom ding lem asa a, Sepguol masapen in gingtha mi 344 in Baptisma a tang hi. Kum 1920 a Aizawl Presbytery in January ha anei ding in a lemsah a, hinanleh a kumkia Presbytery khawmpi in April Ha aman zawh ding in a lemsah kia a, hinanleh April Ha khu nasep a haulaitah uh ahikia zieh in ahun ding kum 1925 kum apat in September Ha a zat ahikia a, tuni tan in zat ahi jingta hi. Tambang a gingloute lah a Sepguol zat ang hitou na ah Mizoram/Mizote kum 1970 apat in Mizote 100 a 100 gingu ang hita uhi.

Tuni in ei gingtute Presbyterian Hattuum ana hikha teng in zong September Ha khu Sepguol Ha in tuni tan in imang tou zel ua, eiten bang chin imang uoi? chi i ki-et ua, iki khuolchil uh pomaw isa uhi. Ha khat pumlum Sepguol izatna uah bang ibuoipi pen uoi ana kipat dan khu ngaituo tha kialei dei aum hi.

I Hattuum pawlpi in tu leh tu in bang ipoimaw in bang itahsap a um ei chi mimal iki etchien chiet uh poimaw isa ua, tamtan chieng a Mangpa'n ang pui tung tah leh nang leh kei in bang chi a pan ilah ua, bang chia, mimal, Hattuum pawlpi in tam tan chieng hing puitu kipahsah theina ding bang teng ah mawpuohna inei uoi chi ki ngaituo tha chiet ding un iki ngen un iki theisah ua, iki deisहतुओ chiet uhi.

Mangpa'n simtu teng tahsa Hagau guoljawlna hing tang sah chietta hen. Amen.

.....

Thy tuomtuom leh Thumpi dingte



THU TUOMTUOM LEH THUMPI DINGTE:

1. District Lienga kumtawp khawmpite lepthana 2018

1. District chin PYF Khawmpite October 05-07, 2018
2. District chin PWF Khawmpite October 19-21, 2018
3. District chin kumtawp khawmpite October 12-14, 2018

2. **ZOU NAMPI THUMKHAWMNA:** Pasion hoina leh mapuina kilam-en kawm in kumteng a ina man zel uh ZOU NAMPI THUMKHAWMNA ahing tung ding October 13, 2018 chiengin Presbyterian Church Lailamveng ah (ZNTC) te panlahna toh um ding hi. Khum hun chiengin i Nampi itna toh lamchinteng a Pasion in ang lapsang theina dingin thum vaui.

3. **BSI KHAWMPI KIZANG ZOUTA:** Apeisa August 18-19, 2018 sung dai ECA Church Bible Hill ah Bible Society of India Churachandpur Branch Khawmpi lawchingtah in ki zang zouta khawmpi vaihawmna in membership fee leh adangdang angaina bang apeatou phot din namkipna nei uhi.
4. **SUNDAY SCHOOL KUMTAWP EXAM:** Pasian hoina leh mapuina toh Synod Year Planner a i mu bang un angtung ding October 28, 2018 Hapta nukhiepen Hattuum chin in Pasian thu i zil uh Kihilna bung I apat II tan leh KNP kumtawp examna um ding hi. Khumni leh hun chiemte kawm in local chin a atamtheipen exam pe din kisakhoh chiet vai. Kumkhat isepgimna thawnsah mailou din hanchiem vaui.
5. **LUNGDAMPINA: David Pautungtuong Phiamphu(Zou):** Dated August 27, 2018 ni a Local paper a imu bangun **David Pautungtuong Phiamphu Zou** s/o Moses Lunkang Zomi Colony a um in tumadeu in Barca-Academy South Mumbai a Official Football School of FC Barcelona a dingin under 15 years trial nei hun ah Selection mu in kigen hi. I lungdampi mama uhi. Ama tu in kum 8 pha pan hi.
6. Thumsahna: Pasian hoina leh kepbithna muongkawm in a 17vei Presbyterian Women Fellowship (PWF) Biennial Conference um ding a, mimal leh Hattuum chin in ini chi thumna uah bawzui ciet vaui.

Amun: Mowlyng Khung Presbyterian Church (Ribhoi Synod)

Ahun: 26th-28th October 2018, ZPWF apat delegate mi 30 ban ah PWF Standing Committee leh Nomination Committee member mi 3 toh sim in mi 33 vatel ding uhi. Thupi: “Na sepgimna Mangpa ah amawhna ahisih hi” (I Korinth 15:58). (In the Lord your labour is not in vain) Thupi teeltu: PWF Zou Synod.

7. **Ei Khristian gingtuten** zalen tah a Pasian i bie theina ding un igam, imuol a LEMNA LEH MUONNA kining chingzawsem Pasian kungah ngen vaui.
8. **New Secretary of NEICC for the term 2018-2022:** North East India Christian Council (NEICC) Secretary tha ding in Rev. Dr. Ramengliana PCI Manipur Synod telching ban ah 6th September 2018 apat in joining abawlta hi. Amaban Pasian nasepna a bawzui tou dingte thumna toh bawzui chiet vaui.
9. **Pastor Quarter tha Honna:** Pasian hoina leh mapuina tangtouzel in Dated 20th September 2018 (Ningani) 11:00am in Central District (MGP) panlahna toh Aina Pastor Quarter Honna lawching tah in kinei zouta Ahongtu: Upa Khupchinzam District Chairman(MGP) Mangpa'n thupina tang hen.
10. **Tuivai District vena:** Dated 2nd September 2018 niin ZPYF Office Bearer ten Behiangjang Presbyterian Church 62nd Biennial Conference mun ding ahinatoh a District sunga PYF member poimaw tahtahte kaikhawm in houlimpina nei in khawmpi mun ding namkipna vanei uhi. Banghun ah zong ini chin thumna uah bawzui chiet vaui.
11. **ZPYF 62nd Biennial Conference:** Pasian hoina leh mapuina kilamet kawm in ahing tung ding January 17-20, 2019 chieng in Presbyterian Church, Behiangjang ah 62nd Biennial Conference um ding hi. Tulaitahin item tuomtuom ah kisahkawlna peitou lellel hi. Thupi: “Jesu Khrist adia ginnamtui” Ahun, amun leh zintuntu dingte thumna toh bawzui chiet vaui.

ZOU PRESBYTERIAN CHURCH SYNOD

August. 20 - September 24, 2018 Sawm-a-khat sungte

- | | | |
|-------------------|------------------|------------------|
| 1. Central Church | 2. Zomi Colony | 3. Manniang khuo |
| 4. T. Tangnuam | 5. Sabual | 6. Aina |
| 7. Lailam veng | 8. D. Phailian | 9. Kananveng |
| 10. Thingkangphai | 11. Tongdam | 12. Emmanuel |
| 13. Zoumun | 14. Mualtam | 15. V. Bethel |
| 16. Hiangdung | 17. Tuibuang | 18. Zomunnuam |
| 19. Bohlui | 20. Imphal | 21. Muallum |
| 22. Buhsau | 23. Hiangmual | 24. T. Khajang |
| 25. M. Buangmun | 26. S. Vengnuam | 27. S. Muvanlai |
| 28. Munpi | 29. Hiangtam (K) | 30. Zoukhonnuam |
| 31. Maokot | 32. Behiangjang | 33. Behiangtung |
| 34. Lunjang | 35. Hiangtamjang | 36. Hiangtam |
| 37. Tuining | 38. Zomi Zion | 39. Gangpimual |
| 40. T. Munnuam | 41. Sugnu | 42. Delhi |
| 43. Chennai | 44. Paspati | |

District wise a Upute Sawm-a-khat upto Aug. 2018

- | | |
|-------------------------|--------------|
| 1. Central District | Rs. 3,08,905 |
| 2. Lentang District | Rs. 99,161 |
| 3. Lamka District | Rs. 4,87,168 |
| 4. Imphal District | Rs. 1,72,719 |
| 5. Tuiningkual District | Rs. 1,15,125 |
| 6. Suolam District | Rs. 66,255 |
| 7. Gunpang District | Rs. 1,82,670 |
| 8. Singngat District | Rs. 27,904 |
| 9. Zoutang District | Rs. 78,852 |
| 10. Tuivai District | Rs. 63,575 |

PASIAN THUGUH KEMTE

- *Upa Suankhanmang*

Laisiengthou tangtel (I Korinth 2:7) Hinanleh koute pen in Pasian pilna thuguh kiphuol, i thupina ding a Pasian in leitung um masang a ana namdet pilna kiphuol thu kagen zelizaw uhi.

Tukum 2018 a ding a kumphuon thupi leh kum 2018 a ding a Sepguol thupi Pasian thuguh kemte chi thupi pansan a Pasian thu houlimna inei ding uhi.

Bangkim bawlthei Pasian in Leitung leh asung a sil umzousie alemguot dan pen leitung leh asung a sil um zousie in aniel thei sih a, bangkim bawlthei Pasian in alemguot dandan in a umjel ding a leitung tawp tan pha in Pasian thuthu ahi hi.

I Mangpa Jesu Khrist leitung alenlai in, a nuazuite akung ah ahing pei ua, Bang dinga gentena ngen a thu nagen ahiei? chi-in adawng uhi. I Mangpa Jesu Khrist in adawng a akung uah “Ajiephen, Vangam thuguh khu noute thei dinga phal ahia, hinanleh ama ute thei ding a phal ahi sih hi. Koipou aneite piehbe

ahi ding a, koipou aneilou khu anei sunsun zong lahpieh ahi ding, tuaziehin, ama ute kung ah gentena in thu kagen ahi. Chi-in nuazuite dohna adawng hi.

Lei kisiem ma a Pasian lemguot dan leh Pasian thuguh mihingte apan kiselgu khu Jesu Khrist mihing a hing pien ding thu khu ahi. Pasian lemguot dan peijel in Bethlehem ah Jesu mihing in ahing pieng a, tua Pasian thuguh Jesu Khrist mihing a ahing pienna in Pasian akiphuon khietna Thuguh langtang tah a tahlat (suhlat) a umna khu ahi hi. Tuabang a Pasian a hing kiphuon khietna pen mipil, misiem leh Judaten atahsang thei tasih ua, atheisiem thei sih uhi. Tuajiehin Jawlnei Isai in ana tangkoupit hute ahing tang tunna ahing hita hi. Jawlnei Isai in tambang in ana tangkoupit hi. (Mathai 13:14-15).

“Zahpen naza ding ua, na thei siem sih ding uhi. Mu pen namu ding ua, na thei chien but sih ding uhi. Ajieh tam mite lungtang amol gawpta a, abil uh abing ta a, amitte uh asingta uhi. Tuachilou in amit un amu kha ding ua, abil un ajakha ding ua, tualeh alungtang un a thei khah ua ahing kinuahei kia kha ding ua ken ama uh kana sudam kha ding hi chi in Jawlnei Isai in ana tangkoupi thu ahing tangtung ta hi.

Korinth Hattuom ah Pasian thuguh Jesu Khrist Khantan gendan a kipang a ama a letnang, ama ki thupi sah nang ama hoinang ama metnang a thugen tampite in mihing pilna toh thu agen jiehun Korinth Hattuom a mite gindan suhbuoi in ana um a, tuachin Paul in Pasian thu ava gen a aman “Jesu Khrist singlamte a mikhielte ding a kilbeh ahi thu lounal bangma dang gen kasawm sih a, noute apan inzong bangma thei kasawm dieh sih hi. Tualeh mihing pilna a thu gending hileng Apolo sang in kasiem jaw ding a himaleh Jesu Khrist Khantan hoi khu mihing pilna a genthei ana hisih a, Pasian a kinga a Pasian Hagau siengthou

panpina bou a Pasian thu genthei ana hijaw hi, chin Paul in Pasian thu avagen hi.

Tuajieh in Pasian thuguh Pasian pilna jieha tahlat (suhlat) a umta I Mangpa Jesu Khrist Pasian tapa tangkhat mizousie hundampa ding a Pasian in ahing pieh khu Pasian thuguh ahi, tam Pasian thuguh mihing pilna leh mihing Hagau in athei phah zoulou khu, Pasian Hagau siengthou silbawl theina jieh a mihing ten Pasian pilna thuguh mihingte apan a phuolmang a um I Mangpa Jesu Khrist Messia khu theichien a ginna neizousiete Jesu Khrist vang a Pasian mai a siemtansah a umte khu Pasian thuguh kemte ahi uhi.

Tuabang a, I Mangpa Jesu Khrist gintatna jieh a, Pasian ngaidamna tangte in Pasian Hagau siengthou puina atang ua, mihing pilna in amu phahlou singlamte silbawltheina Pasian Hagau siengthou in atheisahta hi. Tuabang a Pasian Hagau siengthou pui a umte in Hagau ni anei ta uhi. Khatna ah leitung mihing Hagau leh Pasian sawl Hagau siengthou ahi hilchetna,

leitung mihing Hagau ichipen mihingte hinna ngaisut theina Hagau ahia, Pasian sawl Hagau ichipen Jesun nuazuite kung a achiem banga Pentecost ni a Pasian Hagau siengthou Pasian silbawltheina hing kilang Hagau khu ahi.

Tuaziehin, Khristian tamtah Pasian silbawltheina Hagau siengthou tanglou/neilou

Khristiante jieh a Khristian sung buoina leh nawngkaina umjel ahi maithei a, tuaziehin Pasian thuguh theichienna ding a Pasian Hagau siengthou Pentecost ni a pieh a umpen inei/itan uleh ama Pasian thuguh zousie theisahtu ahi man in, tuami Hagau nei/tangta pou ma Singlamte silbawltheina athei chien ua, a thei siemta ua, tuabang mite khu Pasian thuguh kemte ahi uhi. Amen.

Guolzawlina nah

Guolzawlina nah: I damlou chiengin ang panpi thei ding Doctor i nai a, sum itahsap chiengin ang pezou dia i gintatte inai a, mi zawngte kungah sum kisui khollou hi. Tuama bangin hagau lam tahsap neiten amau uh panpi thei ding hagau lam a hausate nai akiphamaw hi. Abraham zong mi tampite adia Guolzawlina hi dingin Pasian in ahan hi. Tulai Hattuumte i et chiengin hagau lam tahsapna sawlsam vei tampi aum khumbangte tahsap ann koi in hingpe ding e chi thei hasa hi (Kala 4:3-4). I buoina tengteng piengtha lou zieh hiva chi mawh ding inla, piengtha kitam mama taleh kilawm hi. Kum 1980 vel apat Seminar, workshop, chielpina, Camp inei tou uh tunitan inei sun zom zel ua, ga hoi tahtah hing um in i thei uhi. Hinanleh piengtha tam tan in sietna atawm tuon sih. Ahileh i buoina leh hamsatna uh sutlei buoilou gam inei sih uhi. Buoinate suhveng nadia idamdoi zat gige uh zong ettha dia hoi adiei chi in um hi. Tua idamdoi zah zelte pen; Pienthana, pienthana, pienthana Camp, Crusade a dangdang, hundamna thu topsan lou a igengen ding ma ahi. I nielsih Programme izah teng ah Pasian mapui natoh lawching leh kipahtah in izou thei zel uhi “Hinanleh” chi ut huoi hi. A piengtha loute i chielpi ding hitham nanleh a piengtha sate bang law ding...? A hing bachiengua pienthana thu ma genpi tha zel ding maw...? Mangpa Jesu’n a nuazuite a nna gotna ah “Nuazuite aw bawl un”

achia ei pawl in ahileh peinthana ma igen den a khu chi ding ma e? (Matt. 28:19). Tambang hagau lam pichinna leh hinkhuo sangzaw pen aman man in a gen thei ahi sih a aneite mai in gasua tah in a genthei ding uhi. Hagau lam guolzawl na tangsa te mai in midangte guolzawl thei ding uh ahizieh in.

Gilgal khel a pei a poimaw: Elijah in athakhel dingin dial puon Elisha asilsah zouta. Tami ziehin Elisha in gin umtah in Elijah azui pai tinten hi (2 Kumpipate 2:1). A kipatna Gilgal pen Jordan lui kan zou Israelte Camp mun masapen (Jos. 4:19-20) leh khangthate teptanna (Jos. 5:2-9) kisuhsieng na munpi khat ahi hinanleh midangte adia guoljawl na hi dingin Gilgal khel pei akul hi.

Bethel khel a pei a poimaw: Bethel pen Gilgal apat mel 15 vel ahi. Abraham leh Jacob biehn mun (Gen. 12:8, 13:3). Jacob leh Pasian kipawl na mun (Gen. 28:11-19) ahi. Tam mun a umden sil deihuoi ahisih. Galzaw na mun Jeriko tanphah tung ding pei a ngai nalai hi.

Jeriko khel a pei a poimaw: Jeriko Pen Gilgal tumlam mel 15 vel a gamla Kanan gam a Joshua galzaw na mun masa pen ahi (Jos. 5:13, 6:27). A kan khel na mun zong ahi. (Jos. 7). Kul thupi pen leh gal zauhuoipen kizouta ahiman in, maban enlou kei a, tamtan a lungkim, tawldam phot Elisha adin bailam mama ding hi. Hinanleh Elisha khawldam a kholthei ahi nai sih. Jeriko khel ah zong pei nalai a poimaw hi.

Jordan lui a tahtah a sil tuoh etsahna: Tuazou in Jordan a hing tung ua, tam mun Elisha adin deiteel na bawl na mun leh mawpuoh na guonna mun ahi. Khum mun atun tah un Elisha deiteel na sang pen doh in aum hi. A lungtang deiteel na sangpen a puonkhiet tah in a pu hagau tan ni a tung ah pieh in aum hi. Elisha Pasian in azah tahtah theina dingin hagau lam kalbi tampi totsuo h masah poimaw hi. A thu mai a Pasian silbawltheina apat atahtah a Pasian thahat na tanna Jordan tana zuisuoh a poimaw hi. Khenkhatte Gilgal kheel in Bethel ah Pasian toh kithuona mun nuomsa seng a khawlden uhi. Hinanleh Bethel khel ah Jeriko ana um nalai hi. Gilgal, Bethel leh Zeriko ichite Elisha hagau lam kalsuonna ahi. Jordan ah Pasian toh kituoh na (encounter) ahing neizou in Israel Nam tunga guolzawl na ahing hita. Hagau lam pichinna leh gasuona toh kisai in bangtan kal na suonta i!

Khristian Thukizahna July 2018 issue apat lahsawn

ZOUNAW

- Upa M Liansuankap

The writer can be reach @ ilenlailsk@gmail.com

I pulepate hun apat i sutleh Upadi, Tawndan leh Khankhuo kizentah nei leh zuite i hi ua, tuachilailai in 'Zounaw' chi thutamtuhna kamteng khat zong i na nei ua, seplebawl, thutanna chite i nawbawl thop, hoithoubang zong sesenglou silte genna in i zang uhi. Khristian i hina toh i tawndante uh kilebul aumsih. Sakhuo dante bou akikhel giap hi. Upadi/Tawndan/Khankhuo i chi chiengin mihing i pien apat hansunga i kiphumzoutan uh ahuopa, tamte nit a, khoheigamtat hing zangtheite in Pasian guolzawlna tangin aseplebawl uah alamzang zel uh chi thei kilkel in i kitheimawbawl zel hi.

I kipatchillai in i lamkaiten i umna mission ah deilengai nilethum ana ngen ua, pieh ahilou jiehun petkhie in i tangdinta. Ngien toh velvela zaw/mu sawmlou. Sumlepai muna hasatlai, sepna muding umlou, laisiem kitawmvawt hinapi eima kitoudel hattuum hidingin abul ahing patpita uhi. Amaute mawsah i hilaizang sih. Miten adinmun uh thei in thunuoilut in Khantanhoi hing pawte apat tahsa leh hagau a phattuomnate zal hing zoutouin tuchiengin amau kengin adingta ua; ei amau sanga kum tampi eima kenga nadingte mu phahlouin amasawnta uh. Eima kitoudel hoisih chi hilaizanglou i hi. Ei pen taga nawi ngawl mabangin gentheitahin i hing kitoudel vevaw ua, niengletaitaha nu nawitui leh ahun dungzuia vahpichinga hing umte phaladen in i um.

Pasian thu i mu i zah masang hunpen atuomin koitai. Pasian thuawi i hinua ua zong Pasian thu in ahing puohlut sienthoua, theisiemna, eima ki-ittheina, i mihing hipite it theina, dawtheina, thu leh la a kihou dieldieltheina chite tasamtaha i umden mawh zong sun leh zan a tuottuot kiphamaw hi.

Nam vaiah zong thupi khuol leh gen kisa in i hina kumpin hing theipi, Zou kihinapi Zomi chi i na uong bawla, i Laisiengthou masapente ah zong Zomi chin i giel hi. I hinatah hilou ahilam i phoh vaigei.

MLA/MDC deina leh utna jiehin pawlkhatin kikhopna khat Siel gouzena nei ahing sawmleh, tua gaw dinga kikhi Siel hakhietsah a um in, kikhenna huoisetah hing tunlaw. Tui kibawsa luohtheilou chi

khu hing hita.

Laisiengthou dei in uimeikang i bangkia ua, BSI in mising tawmseng uteh ahing chi uleh i lamkaipu Rev. L Taithul in, “Ta tampipi hing nei in kum tamloukal in hing tamta ulenglah chin ka chimaw dawn hi” achi hi. Deitasengin Thugin zong bange chi geltavatelouin Common Bible sut ding kithutuohta mawh. Anuasanga, Thugin paulapin eima mitmawnate selnakawmin kituohlouna hing piengin seni i kisuota. Kigawmkia sangin setampia kikhenna ahing hita.

Common Bible, Laisiengthou (BSI) leh Zo Laisiengthou (Myanma) i neita ua, hamzahdan suhtuoh sawmna panlahna bangtan aheikhat lawching i bang ua, , lawchinna tahtah dingin lampi sautah kalsuon ngainalai ding abang hi. I Laisiengthou (BSI) edition nukhiapen bangah, ham tuom bang hing pang mawh ahivanga pomsuhthop Zelmai! Laisiengthou lena leh revision bawlina dingin hun kichingtah pieh i hia, hinanlezong nawbawl veve! A version thu leh aledan ah zong i lungsim tawnga ngaisuta, bangamakhat bawl hoileh kilawm. Laymen ngaisutna ah zong lunghimawhuoi tamseng.

Lailam Sai Zou Literature Society (ZLS) i neia, Pasian

guolzawlina toh eima ham a laiziltheina class xii tanah Kumpin hing piein i neita. Ahivanga, ZLS in tudinmuna laiteng zahdan abawlte zuisawmlou hilei kilawm. I identity ahia, midang toh i lamdanna Pasian hing pieh ahi chia i pomkip a zah i kizilvevaw hoi hi.

Hattuumte bulpi kivaihawmna meetingte aum chiengin, agenda khu talsawnzana ngaituoa, taikhuo avahleh vah chia panlah sanga zawmengmenga, kilena ding Gari timing ngaisutna leh eima silte ngaikhohna lienaw abangnalai hi. Kumtawp vaihawmna ah pangin atawptan pangngaplou; eima lunglutna thute maimaia kukaltaha pangtentun chiindan toh kikhenkhiat hamsa i samama hi.

Committee chiengin agenda tungtawna mimal kikheuna i pibawlnalai ua, thu ah umlouin midangte hinkhuo i habuoipiseng uh abang, masawmna ding daltu khat ahi. Tuabangmain agenda i guon chiengin zong, huopzoutaha bawldan kizil sawmlou i bangnalai uh.

Hattuum kivaihawmna khu atamzaw deidana peizing ahi chi hilezong pichingtah kivaihawmna ah voting kibawl mengmenglou ahilam kimanghil bawlin, tamzawh leh

huham thu a vaiveng mai dinga lunggelna i koimangthei naisih hi.

Thuneina leh mawpuohna kizawhkhawm ahilam phohnapin amasapen i pibawl pongsan hi. Tam thuneina toh kituoh mawpuohna in gamgi kichientah anei hi. Thuneina khu mawpuohna in nemtahn athahatsah hi.

Pasian thu eima kimupailтна himlanga zahsangan mite mupailтна hoitahn i zanguh abangnalai.

Thu iptadi ding leh genkhietpai ding khentelthei napin akibangan i zangtama u, tua thu pen mi toh i kikala kizopmatna kellei sangin dai/pal i suotazel hi.

Thudih avelah chia asuhkhah ding akimlepam velchien seloua tangkoupipai khu dihtatna leh hangsanna i hisah un; khuong zielziel in kisiemtansuh, Pasian deilam ahi chimai! Agenna ding amun leh hun geldetdeta kizentaha puohkhietta gendan kizil sawmvai.

Eima thei leh mudana hoimama i lawmtan ahing niel chienga adih leh hoi ahi chia khapetzana pangtentunmai; mailam huna genthei/kikupzel dinga koidan kizil sawmloua anielte mawsah kawma nua ngapmai. Upaten thu hasa amaituoh khah chiengun, ‘Upa dong

bouvai’ anachizellam uh theinapia pongpanmai.

Hattuom sunga nielkalpawl/ opposition umtawbanga lunggel neia khotanga kilangpha thei dinga genlesah kisum sawmlou thamloua pulpit tung nasana tangkoupi ngapna khu koimang sawmlou i bang hi. Pulpit khu tahsa hagaua i kivahna tuinah ahia, asienthoua i suhbualeh tui nin dawndawn i hia, damlouna tamtahn hing bawmvn, khandan dihin khanglou ding i hi.

I kipiehzawna, i phatuomngaina leh i hithei dandana pan i lahnate i lungtanga chipbelhaikai bangdenmai; i pankhahlouna lamlam hawmthawmai, miten thu leh la gensiem leh vaihawm siem ahing chilailai ua zong, mi adinga dongkhol i hilam theiloua umkhahthei ahi. Pasian geldoh zelvai.

Pawlpi sunga semtute adiehin Pastorte/Ministerte siempi ahina uh lamsangan atha ngahdan uah i lunglutzawh jiehun azatat huoina uh ngiemtahn i koi ua; amauten zong aseplebawlна uah amau kisiensuona chiengtana sep sawm bangin akilang uhi. Amaute gieutautaha i sepsah zong kisunlana i nei sih hi. Sepkhop dan i siemleh masawнна ahilam haivawtlou kihinapin thudih lom

khenkhat toh kiseptuotuo in i hun
hoi tampi i mansuota.

I lungloulam hilezong i kikuppite
tawldamtaha koidan kisiemla deua,
tuamabangin tuabang bawltheite/
gentheite zong asan/alahdan i siem
sih hi. Leitung damsung khu kizilna
hun ahia, thaseloua kizil ngapte
khangtouzel ahimanin panlavai.

Local hattuum khu Pawlpi adinga
akingapna suongphum (foundation)
ahipena, kivaihawmna dana aneupen
bangin kilang nanleh; thuneina

lienpen nei ahi. Pawlpi thuhun
zuiloua sil phatuom dinga Pawlpi
kung tung ding silte atunsah
sihle zong atungah Pawlpin bangma
alawthei sih chi thutah ahia,
ahivangin tuabanga bawl khu khelna
huoisevawt ahi chi i theikilkel hi.

Upaten na lungthah chienga kam
nakeh masangin, na Dip ah nah
inlen, na Tai ah nah masaphotin
achi un khantanhoi toh kituoh mama
hinapin eipenin i awm tana zong
nahmanloua soukheliehlieh mai haia
Zounaw i chipen kitungpaipai!

PASIAN HATTUOM

Mathiu 16:18

*Tualeh Ken zong na kungah, Nang Peter na hi, chi ka hing hil ahi, tualeh
tami suongpi tungah ka hattuum ka lam dinga, mishi khuo kul kotkhaten
tuami azouthaw sih ding hi.*

Thumapui:

Pasian in van leh lei a siem in lei khu lim-le-guong neilou ahia, vah a um
nailou ziehin a hoina mu thei ahi naisih hi. Tualeh sun a tang ding vah leh
zan a ding miel chi khen ahi nailou ziehin ni sim thei ahi naisih hi. Pasian
in ni khat ni in vah a siem a, tuachin miel-le-vah kikhen in ni khat ni ahia,
vah a en a, hoi a sa hi.

Ni 1na: Vah siem in un leh zan (miel
leh vah) a khen a hoi a sa hi.

Ni 2na: Tui leh vanthamzawl siem
in a khen hi.

Ni 3na: Leitung leh tuipi a bawl in
a khen a hoi a sa hi. Annte-louhing,

theikung.ga neite leh loupate a
poudohsa a, hoi a sa hi.

Ni 4na: Sun leh zan khenna ding in
nipi, hapi leh aasite a siem hi.

Ni 5na: Tuisung a um ding ganhing

leh tung a leng dingte a siem in hoi a sa a, chi tampi nei a hing pung dingin a guolzawl hi.

Ni 6na: Leitung a gamtang dingin gantate, ganhingte bohvahte, gamsate a siem a, hoi a sa hi. Tua teng zou in Pasian in “I kibahpi eima meel bangbang in mihing siemvai in amauh khu tui a ngate, tungleeng vate, gantate, Leitung pumpi a ganhing, Leitung a bohvah zousie tungah thu nei sah vai” achi a, ama kibahpi in mihing asiem a, tualeh ama limlemel puo in pasal leh numei asiem hi. Pasian in amauh guol azawl a, akung uah, “Chi tamtah suongin hing pung unlen, Leitung luodim unlen, na thu thu un umsa un; tuipi a ngate tungah, tunga leng vate tungah leh Leitung vah ganhing chinteng tungah thu nei un” achi hi. Pasian in “Ngaivawi, Leitung um annte louhing chi nei zousie leh sing chi nei ga umna sing chinteng na kung uah kahing peta hi, tuate khu nou a dingin na ann ding uh ahi. Tualeh Leitung a gamsa zousie, tung a leng va zousie leh Leitung a bohvah hinna nei zousie kung ah a hinna ding un annte-louhing ka pie hi” achia; tuachiin tuabang ahing hi ta hi. Tuachi’n Pasian in a silsiem zousie a en a, Ngaivawi hoi asa mama hi.

Pasian in sil siem dangte a siem zou in leivui la in a khut mama in mihing

a siem hi. Silsiem dangte “Hing um hen” a chi a, a um mai hi. Hinanleh mihing pen Ama khut mama toh lei a leivui la in ama hinna nahhu ngei hakhum in a siem hi. Pasian in silsiem tamtah siem nanleh a vave zel chi Lai Siengthou ah a umsih a, mihing pen a ve zel chi kichientah in i mu uhi.

Hattuom lamtu khu Jesu Khrist ahi Mt. 16:18: Tam atung a Lai Siengthou i tahlat khu i Mangpa Jesu Khrist leh Nuajuite kihouna ahia, Mangpa Jesun Nuajuite kung ah, *“Miten kei koi hi a hing chi uoi?”* chiin a dong a, tuanah Nuajuite lah a hangsanpen Peter in Jesu Khrist hina dihtah a gen hi. Tuanah Jesu Peter kungah, *“Nang Peter na hi, chi ka hing hil ahi, tualeh tami suongpi tungah ka hattuum ka lam dinga, mishi khuo kul kotkhaten tuami a zou thaw sih ding hi”* a chi hi. Tam Lai Siengthou in Mangpa khu Hattuom neitu ahi dan chientah in a gen ahi. Aziehpén Jesu mama in, *“...tami suongpi tungah **Ka Hattuom** ka lam ding...”* a chi hi. Ei gindan ah Pasian khat a mi thum (Pa Pasian, Tapa Pasian leh Haugau Siengthou Pasian) khu mihing khat a thum (3 in 1) ahia, hina kibang, silbawltheina kibang ahi uhi. Tuaziehin Jesun “Ka Hattuom” achileh Pasian Hattuom, Hagau Siengthou Hattuom leh Jesu Khrist Hattuom ahi hi.

Khenkhatte ngaidan in Hattuum neitu khu Pastor-te, Upate leh vaihawm-lamkaite dan in i gen ua, tam khu i ngaituo khiel mama uhi. Pastor, Upa leh Lamkai khenkhatten zong “Ka Hattuum” i chi thei valiang uhi. Hattuum khu Mangpa a ahia, eite a enkol ding a ngansiete i hi bou uhi.

Khrist khu Hattuum lutang ahi:

Ephesa 5:23 ah *“Aziehpen Khrist khu Ama ngel tahsa pumpi, hattuum lutang leh hundampa ahimabangin, pasal khu zi lutang ahi hi”* a chi a, Kol. 1:18 ah, *“Khrist khu tahsa pumpi chipen hattuum lutang ahi, Aman bangkim a tungnunna a nei theina dingin silzousie kipatna bul ahia, mishite lah a kipat pieng masa pen ahi”* chiin Sawltah Paul in ana giel hi. Tuaziehin Khrist a dingin Hattuum khu a tahsa pumpi leh Hattuum a dingin Khrist khu a lutang ahi hi. Tuaziehin Pastor-te, Upate leh lamkaite Hattuum neitu i kichileh Khrist sang a tungnung zaw a kikoi kihi kha ding ahi. Khrist khu Hattuum lutang ahia, Hattuum khu Khrist tahsa hi in tua Hattuum sungah Hattuum member-te a um a, tua Hattuum sungah Pastor leh Upate zong member khat hi in Hattuum sung a member um zousie enkol ding leh kemtu ding a ngansie i hi uhi. Thuneina toh kem ding zong hilou in itna tah toh kem

ding leh enkol ding a ngansie i hi uhi. Tam i etkol Hattuumte khu ei thuthu a etkol ding hilou in a neitu Pasian deidan a enkol dingte i hi uhi. A neitu Pasian jatatlou a ei ut bangbang a thunei kisa deu mai a i etkol ua, lam dihlou a i puikhiehl uleh Mangpan eite tung ah leiba ahing phul ding hi. Hattuumte kipahsah ding, thanuomsah ding, hatloute hatsah ding, damloute thumpi ding leh Hagau a liengvaite sawmdawl a, entup leh lamdih kawhmu ding khu i nasep ahi. Mangpa neisate tung a eima ut dandan a vaihawm ding hilou a, a neitu Mangpa deidan sui kawm a pui dingte i hi uhi. Eiman bangma puohkhiet zong neilou a, Hattuum mipiten a hing piehkhawmte bang uh laan a, ut dandan a zang ding i hisih uhi. Pastor-te leh Upaten silpieh i laan ua, “Mangpa Kangkou-meikuong, guta-lata lah ah hing venbitsah in” i chi ua ei a laantute mama in a lepguh ding thu i gen kha leng uhi. Jesu Khrist in Pasian sum khu Pasian pie unlen, Kaiser sum Kaiser pie un ana chi hi. Tuaziehin miten Pasian a ding a ahing pieh uh khu Pasian a ding in; Sawm-a-khat, Anntangham, Missionary Box, Ginna Thuchiem, Local Fund, BSI leh adangdang hitaleh a tunna mun a tunsah ding khu i mawpuohna uh ahia, tua khu tunglam a pat hing en zing Pasian deidan ahi hi. Aipi a sawi vahleh a noute zong a sawivah i chi

bangun Pastor leh Upate hoi masa vai in tuachiengin mipite hoi dingin pui vai. Ei kibawl hoi masalou in midang i bawl hoi theisih ding hi.

Koiman ama tahsa a muda ngaisih:

Ephesa 5:29 ah, *“Aziehpen koiman ama tahsa a muda ngaisih a, Khrist in hattuum a vah a, a kep bangin, avahin adeithaw zaw hi”* ana chi hi. Jesun Johan 15:5 ah, *“Kei grepgui khu ka hia, noute abahiangte na hi uh, Mi koipou keima a a um zing a, Kei ama a ka um zingleh ga tampi a suong ding hi. Aziehpen keima louin bangma na bawl thei sih uhi”* a chi hi. Tuaziehin, Mangpa Jesu Khrist toh kizopte khu Ama Jesu Khrist toh sapum khat i hi uhi. Ama toh sapumkhat i hi uleh Ama sapum Hattuumte khu i it ding uhi. Aziehpen koiman ama tahsa a muda ngaisih chiin Lai Siengthou ah i muchien mama uhi. Hattuum lamkai kichi ngal a, Hattuumte it theilou a, kimawl na a zang thei nalaite khu Hattuum neitu Khrist toh a kizopna dihloou hikha ding hi. Jesu Khrist a um a, eima sunga Jesu Khrist a umleh i kizopna Hattuum khu it tah in i kem ding ua, a neh ding pie in a hoina ding i ngaituo ding uhi. Azieh khu koiman i tahsa bahiangte lah ah muda tuom i nei theisih ua, i it sem zaw un i kem hoi zaw uhi.

Pasian Hattuum Ama sisan a a leisate:

Nasepte 20:28 ah,

“Tuaziehin noute pilvang unlen, belamhonte zousie vengun, Pasian Hattuum Ama sisan a aleisate vah dingin, Hagau Siengthouin amaute lah a belampu hi dingin noute ahing guot ahi” chi a kigiel hi. Hattuum khu Jesu Khrist in a sisan a a leisa ahia, tuaziehin a it mama chi a kichien hi. Lai Siengthou in *“Min a hinna a pieh ban a itna a umsih”* a chi hi. A hinna itlou a, a mangtouna hing nuaise a hing tanpa khun A Hattuumte i kepdan ahing en zing hi. Johan 3:16 ah, *“Pasian in vanney a it sengseng a, tuachin a Tapa tang neisun a pie hi”* a chi hi. Hinna phal ngam a sisan a kileisate i kep dan a leitu in a en zing chi thei a Ama lung tuoh ding a etkol ding ahi.

Hattuum lamkai khu Pasian gou kem leh Sil hoi bawl ut ahi:

Tita 1:7-9 ah, *“Hattuum lamkai pen Pasian gou kempa ahiziehin genbanglou, mi kiliensah hilou, lungthah bailou, zu dawnlou, miphohtat hilou, sum met dei a huoiham mi ahilou ding ahi, Mi kiphah, sil hoi dei mi, lungsim dih, mi dihtat, mi siengthou, mi kidehthei ahi ding hi. Thugin toh kituoh pomtah thute dettaha tudet mi ahi ding hi. Tuachin thudih ama na kihilsa akipat mi dangte ahantawh theina ding leh thudih a nielkal dan uh ahilchien theina dinga thuhilna dih a tuhdet ding ahi”* chi in Hattuum lamkai ding khu a na deltel mama hi. Tam i Lai

Siengthou i simleh Hattuum lamkai khu Pasian gou kempa ahi chi chientah in a hing hil hi. Tuaziehin mi neu hilou in Pasian in A neisa kem ding a ahing ngansie thei mi khu muon tah, deisahna tangte i hi uhi. Aziehpén leitung neisa bawn i muonte chilou midang kikemsah ngamlou ahia, Pasian in zong a hing muong a kemptu ding a hing tel ahi chi kingaituo a gin-umtah a kep ding ahi.

Tualeh I Tim. 3:1 ah, “*Hattuum lamkai ut khu nasep hoi sem ut ahi*” a chi kia hi. Tam leitung a i taam sung un melmapa a hat a, nasep hoi sem ut a i kipieh lai un i theilou kal un sil hoilou, i sep utloupente zong a hing semsah leng hi. Tuaziehin adieh in Hattuum lamkaite khu sil hoi sem ding a siem leh ngansie ihi ziehun i sep utlou melmapa deidan semlou a Pasian Hattuumte kemptup zaw ding in kisingsa tha va ui.

Pasian pen buoina Pasian ahisih
1 Kor. 14:33: *Pasian pen buoina Pasian ahi sih a, lemna Pasian ahi zaw hi. Misiengthoute hattuum zousie a ahi bangin*” chi Sawltah Paul in ana giel hi. Tuaziehin Pasian ka nei i chileh buoina bawltu hilou in buoina vengsah leh kilemsah ding a pan lah zing ding ahi. Khatveivei chiengin Hattuum lamkaite kilemna bawltu ding i hi lai un buoina

bawltu, huptuom-paituom nei leh sihnei-langnei i hika leng uhi. Setan in bangchi tuh in pan la in kibuoina ding bawl nanleh Hattuum lamkaiten Pasian dong kawm a kilemna umсах ding khu i Pasian deidan ahi hi. Pasian khu itna ahia, eiten zong ki-itna hinkhuo i zah uh a poimaw hi.

Mihing vang a maw ngailou ki-umlou hi. Hinanleh, Bawlkhiel-sep khiel i nei hun chiengin zong Hattuum a kilemna ding ahileh “*Ka bawl khiel hi*” chia i bawlkhielna pom ngam a, i bawl hoinate zong kisuonpi ngam ding ahi hi.

Bangteng hileh Hattuum khu Pasian a ahia, ama dei dan in, ama lungsim en kawm in, Pasian mai a kisuonpi ngam ding khop a i etkol uh a poimaw mama hi. Pasian Hattuum, Jesu Khrist in a lam tou, Ama tahsa leh Ama ngei khu Hattuum lutang ahia, A sisan a a leisa ahiziehin ei sil hoi bawl ut a, Pasian gou kemptuten kem siem in A neipa hing pei chiengin Mangpa mai ah i nasep man mu ding i hi ziehun Gin-umtah in kem va ui. Hattuum khu Mangpa a ahia, ei a hilou, koima a tuom hilou in Pasian Hattuum Siengthou ahiziehin kemptup va ui.

Mangpan athu tungtawn in simtute zousie hing guolzawl taken.

TEHSETE TUNGA SILHOI SEPSAH DINGTE:

I hatlai leh hoilai huna theidia poimaw mama, “Ka dam sawt leh dachieng kei hing tehsem ding kahi” chi ahi. Tehsete tunga silhoi sepsah dingte ihidan manghil vawtlou ding ahi.

* Tuaziehin * Lampi a tehsie na tuohkhah leh lampi a napei na nunglama hing peiten hing phudong sim uh ahileh koi e theisawm in na mitsih in en inlen, tehsie ahileh khawl * inlen ama peisah masa in. * Na mailanga tehse anapei a makhel na ut leh kamsiemtahin pi e, pu e, hepitahin * kei kana pei masa ding aw, chimasa in makhel in * Lamlien na kaan sawm lai a, na kung a tehsie lamkan ding aum leh na nunglam e...? na mai lang e...? ah peisah lou in, na gei ah ding sah inlen, ama toh kizoh in lampi kaan in, ama veng * nahi dinga, a hamuontu zong na hi ding. * Heimun ah zong (melthei, meltheilou) tehsie hatlou tuhngai, leh panpingai * na tuohkhah leh kithei maw bawl vawt sin * Lampi a tehsie hatlou vanpuo, vankuo, leh akhut a khai na tuoh khah leh tehsie panpi na dia hun lemtang neikha nahidan kithei inlen, na bawl thei dandan in dawn in. Na min e, na umna e, ang doh leh peitoh thuo a dawng mailou in chiengtah leh * hoitah in hil in * Kum tam lamte’n hawna ding mun theichien mawh loupai a a gintatna lam uh zot aching uhi. Khumbang na tuohkhah leh hing dong in dong sih taleh aumdan leh khohei dan pan a buoisim hi-a akilah leh ngaisah inlen ahawna ding mun chiengtah a na thei pen hil in. A hawna mun tan vahil thei dia na um leh a muntan vaha khie lechin kipah mama mai ding hi.

Ruth Messenger July-August 2018 apat lahsawn

“NA PASAL VA HAN INLEN HING PEI KIA IN”

Pasian in (II Lengte 4:26; Jn. 4:16). Pasal ama mai a um ding hoi salou in aki thuopi ding Numei siem hi. Numei siema aum masia sil siem bukim nailou hi. Mihing khat bawlkia ding bangin, a mihing a bawl masah Adam bangin leivui in bawl mai leh hithei thou leh kilawm ahi! Bang zieha Numei a bawl masah Adam apat lakhe sese adiei maw! Bang a hei saupi mulawhna leh planning nei hingeri dingin gintat huoi hi. Pasian in Adam apat lakhie in Evi abawl sese na in kichimatna thuhtah gen nei hi. Lawmta hina mai hilou in Pumkhat, sakhat, kikhen theilou kingainatna nei in bawl hi. Gan hing dangte zong Nupa dan in umsam nanle uh a mihing bawl nupate toh

kiha bahlou seng uhi. Abawlpa bawl dan himhim zong ki habah lou seng ahi chia! (Gen. 8:1) apat sim le chin tangton Mangpa, Abraham kung ah hing kilah hi. Abraham a dahtou leh a kung a ding mithum mu hi. Amauten Abraham kung ah “Na zi Sarah hei a um ahei? Chiin dong chitchiet uhi. Abraham in ji anei ahi lam thei mama uh china ahi. Abraham in a ji puonbuh sung a um ahidan hil thei pai hi. Tulai in pa tampite kung ah tam dohna bang chet hing kidong phut leh i dawng pai thei ding uai..? Jite umna mun dihtah thei but lou tampi um dingin ka gingta hi. Adieh in Lamka khopi a tengte chi tuom deu moh lei, jite inn a um manlou, niteng a pawtkhie himai, Office kai hileh thukhat, hona ding nei gige nupi kitam mama mai hi.! Ji leh pasal ihingal leh i umna gamlat leh anai thu tuom hitaleh, sil himhim kitheipi hoi mama hi. Papi khenkhat lah jite sum neiza theipi malaha, Bank a anei za nangawn theipi banlou umtham din ka gingta, nupite hindan apat inn sung kem man mawngmawng lou “Tate” toh kithuo manlou zen a “Nupite” kholai a hei, midang inn ahiei vel a hun vazah bei deu gige leh inn a um manlou zen a buoi gige pen jite umdan din kilawm mama lou hi. (Thupilte 31:27) ah jihoi nasep tampite lah a kigen khat “Aman a innkuon sung kem hi” chi ahi. Ama bawl tu Pasian in Abraham kung ah “Na ji hei a um ahei? chi dohna a bawl lai a Abraham in puonbuh sung ah chi-a a dawn thei chet pen thupi mama ahi. A dongtute a ji umna mun lungkim ma ahi ding uh; bang dia puonbuh sung a um zing hing potkhie leh chi ka hi uh aw...! Papite aw tambang dohna hing kidong leh i dawng thei chet ding uai? “Ah” inn sung a um-um kasa a, hoi a haw khie man zel e? Na nu va sui ven chi bang hileh heilam, heimun koite kung ah i sui ding uai le? Na ji heimun vel a um hidin na gingta ei...? A umna dia i gintatna mun vel bang zong a um na hing dongte kunga genkhe ngamlou mi tampi ki-um nalai maithei ahi. Jite aw leivui a bawl hilou in Pasal apan piengkhe nahiman un, na pasal toh na kichimat ding uh a poimaw mama hi. Inn sung taisan a na dienkhiet kal in, na inn sung ah bang vai ana um a, atawp chieng a zalah gop ding na mah..? Na pasal leh nataten hing ngah den uhi. Abraham in mikhuol aneilai in a ji Sarah inn sung ah ana umkhinkhien a, a pasal leh a zinte vaihawm bangkim ana za a, a theipi mai hilou in aneh ding uh ana bawlsah hi. A zinte uh lungkim mama in, a nupa un guoljawlna pie uhi. Gentalei Evi in sawlna a tuoh lai in, Adam akungah um kha lou ahi de aw... chi hing ngaituosah hi. Umkhawm hile-uh pen neh ding leh neh lou ding thu kikum khawm deu leh uh kilawm kasah thu man ahi. Evi in a thuzachte

ah ama in thutanna bawl pailou in, ka pasal kang dong phot ding chi thei phot mai leh hoi mama ding hi! Ahinlah sil himhim khonung a, a kikhel nung vel in ahi didan kithei zel hi e. Adam dong kha chet hileh uh pen nehluo ding Pasian in chi ahi. Tam theiga sese lou zong ineh ding atam hi. Neh lou ding pen tah va neh teitei ngai loupi chia dawng thei ding a gingta hi veng aw. Ama thu tumtum a um, ama leh ama ngaidan a thupuona bawlda maileh maw ... Thupuona a bawl masang a anu, apa toh a kikupkhawm poimaw ahi chi ang zilsah mama in ka thei hi. Tulai nupa kal buoina leh innkuon buoina tampite zong nupa ki doh detdet umse lou a jite amau hoisah bang a thutanna ana habawl seng uh hilou maw! Adam lunggel ding ka ngaituo dan maw “Maizen aw thu na zah tungin theiga lou pai lou in hing dong masa lechin hoizaw mama ding hiven maw! Tunlah sil teng kikhel ta, ka ji nahi chiengin kikhen la kikhen thei sih vai in! I shi leh shi khawm suh mai vai chia aman zong theiga aneishuh mai hidin ka gingta. Tambang pien deu in Nupa ihina apat thupuona khat hoi in hoisih taleh thuohkhawm mai angai hun umzel hive aw! sawlna himhim atung a alimchi, ahoi, kilawm, sietna ding ahisih leh kilawm zel mai ahi. Ahinla saudeu ngaituo in pen ahoilouna kimupha thei um hi. Singga pen etin limchi in hoi mama, sing dang gate toh zong ki lamdang tuonlou tamtan tunna ding singga hisih leh kilawm hi. Saudeu ngaituo in pen “Na neh uleh na shi ngeingei ding uh” chi ahi. Tualou a zong umthei thou, etla man maimai zieh a iva bawl khiet thute hive aw i hinna hing subuoi zingtu sawlna leh khelna ichite vel atung in nophou ding hive aw maw? Lungkieh huoilou isah simte zong a khonungin a nuom non khol sih a hiven. Jawlnei Elisha mu sawm a shunam Numei akipei vatvat lai in, a pasal in, bang zieh a tun ama kung a vahaw ding nahiei? Hatha ni la hilou a, Sabath ni zong la hilou a, “chiin a awilou thu genpi nanleh” a hoina jie in Elisha mu ding in taikhe vingveng hi. A pasal thulah lou leh zatat lou kasa seng a, ka ipla tha suoh mai hive aw. A tapa uh shi thu ahileh zong bang dia hoitaha, sil umdan apasal hillou talawm ade aw “A hoina” achi vatvat bang gen a kinei ahi de aw! A tapa uh shi thu leh damsah kia dia Elisha han ut ahileh sil umdan a pasal kunga hoitah a hil poimaw kasa mama hi. Khenkhat bangin pen ki Pasian thu awisah, Pasalte bangma mulou chi khum nuom ding um kagingta hi. A hoina lam tampi um nanleh a innsung uah a pasal sang in vaihawm zaw in kilang mawh hi. A pasal kunga sil umdan hoitah in gen chien leh ama, a Numei pen va taikhiet ngai sese lou a, a thahat zaw a pasal zong va tai thei tham

a chisim in um hi. A pasal sanga ama kimuong zaw hinanlezong hoitahin gen leh a pasal sang in zong atapa damna ding hi Phal mama ding hiven maw! Pasian mi Jawlnei leh Pastorte kunga thu gen dia a pasal muong zoulou ama kimuong zaw hi pouma ding hi. Khumbang deu numei fel kisa huntou eima pasalte sang a kimuong zaw, fel kisa zaw, chethei kisa zaw, eilah ah zong umthou hive aw, Pasal te bangma mulou, thuzuou leh thutah bangma hil nuomlou Hattuum Upa leh Pastorte kung vel a na hahsatna leh na buoina uh na tut ut chiengin, ahithe i lei leh na pasal toh hawkhawm zel un aw, A tuoma haw, aloutheilou hina mun ah pen kithei a, langkhat lam mai thuzah chite vel pen, Upa leh Pastorte adia zong thutah leh thudih thei hasa mama hi. Shunam numei in Elisha mudia, avatai vingveng leh adohna mu “Na pasal adamna maw? chi ahi mai hi. Ngaituo sau deu nalai lei numei tam tan a nang mai nang haw na pasal umlou e? adamna maw? Na ni un hing haw leh uchin hoi ding hia, chi a kinei in, na pasal a damna maw ana chi himai thei ahi. Nikhat Mangpa Jesu Samari gam a khuolz in gim mama in tuikul gei ah tou hi. Anuazuite khopiah neh ding lei a akuon khiet sungun Samari numei khat tuitawi din ang kuon hi. Bible ah tam hun pen nai 6 achia, tulai ham in nai 12 ahi Jesu toh Pasian thu phur tah in houlim zing uhi. Numei in tam gam tantan tuitawi a kang kuon nonlouna ding in tam “Tuihing” hing pe ve chi hi. Numei nu thugen dan a pat kamudan phattuom ngaitaha sun tanglai, nisat lai kholum laitah zong chilou a tuitawi dia kuon gige zel ka hi. Khumbang tui aumleh hing pe mai ve. Tuitawi dia tam tantan nitenga kuon gige ngailou din Ama awlna ding khu ngaituo kin mama himai! Tam tuikul tuite tuihing suohsah vele, ka tawi ua, tam tui ka dawn ua, ka dang tah nonlouna ding un chi hileh awmthou ahi. Hattuum chidamna ding, khotaang chidamna ding, katate chidamna ding ka pasal kibawl hoitheina ding lampi um ahileh, hing kipan inlen ka thumna hing dawng ve. Niteng a inn leh pasalte nuosie zen a kei mai ka hing kuonkuon louna ding in. Thum khawmna a ka haw ngai nonlou din, chimoh leh dihthei lou ding hi. Nang chau a Pasian thu ngaikhie a na kuon gige pen Jesun deikhop lou in phut/nget hing nei lai hi ding ahi. Na koite hing phut ahi diei? Jesu’n vang ka hing pie aw le chi pai lou in “Na pasal vahan inlen hing peikia in” chi san hi. Na pasal vahan in, na pasal hingpei henlen, nang pen inn ah ana um in, chilou in chin, ani ua, Jesu kunga vapei kia din hil hi. Pasal toh sil bawlkhawm, sephawm thu um khawm poimaw hina e maw! Suuntang lai a ama chau a tuitawi dia kuon gige poimaw mama ahi diei? Tam numei nu

toh kisai ngaidan gen atam mama hi. Khenkhat in a gamtat dan ahoilou zieh a midangte mu dinga zum ziehin, mi umlou lai deu a sunlai a tuitawi zel hi dingin a gingta uhi. Khenkhat inla ahtui lampang sang a zong, sil dang sui leh lamet neizieh a sun a tuitawi suonlam anei a potkhie hi dingin gintat thu gen uhi. Bangteng hileh Jesu'n pen nupa a Pasian thu a ngai khawm uh deisah mama hi. Na pasal toh Pasian thu a na houlim khawm ding uh Jesun poimaw sa in lunggul mama hi. Nang lunggul in na nei tahtah ei? Na pasal tellou a nuomsa zaw nahikha ama le? Tuitawi poimaw tahtah ahileh bang dia numei in tuibel a tui puo a kile kia pailou adiei? A tuibel nuasie in akhuo ah apeikia a Samari mi tampi'n Jesu a gintat law uhi. Tam Samari mi tampi lah ah Samari numei nu pasalte a telkha diei maw, Pasal lah a hautuoh ngal a, Jesu'n pei inlen na pasal vahan inlen hing kilekia in chi ahive Na umna Hattuum, Khotaang mipite leh gammiel ichite sang in Jesu'n na pasal leh nangma toh houlim khawm ut gige hi. Na pasal va han inlen Jesu kungah peipi in Jesu tuihing lui ahi: Khum tuidawnte dangtah kia nonlou ding uhi. Jesu ah lungkimna, kiningchinna, tawldamna aum hi. Tam tuihing na pasal dawn din na deisah sam ei unau? Nute aw, na pasal leh tate na deisah ua ahileh amaute Jesu kunga na zawpi theina din a thu agenthaw gige sang in na umdan, gamtat-khohei hepina hamkam kilawm, dawzawna, nunnemna, kidehtheina, kingainiemna leh sil neu nounou tanphah a dihtatna leh na itna in langkhesah masa lechin Mangpa kung ah na pasal leh natate, na peipi theipan ding hi. Kam a genthaw mai in pen ang thulah tuon sih ding uh. Tutung Mother's day/ ahi toh kiton in na pasal toh Jesu sieng zuon khawm thei ding panla tha in "Mangpa ka pasal hinkhuo heng lamdangin chi-a na thum gige sang in" Mangpa aw ka pasal toh kituoh thei dingin keima ma hing henglamdang in aw. Nute Mangpa'n hing henglamdang chiet ta hen aw Amen...!

Ruth Messenger May-June 2018 Issue apat lahsawn.

SYNOD CALENDAR 2019

Synod Calendar 2019 zaw ahita a, a deite leh a zua sawn utten bangchih lai pou in Office ah mu thei zing ahi. Arate ahileh khat ah ₹ 30/- achi.

Ordain Suunna

UPA KAICHINKHAM KUM 71



Upa Kaichinkham kum 71 tanchin tomkim:
Kum 1947 in Suongkuong khuo ah apieng
hi. Kum 1950 in Sielna khuo ah pmlut in
kum 1958 in Khristian ahia, 1964 kum in a it mama a lawinu
Vialvung toh pupa dan in ana kiteng uhi. Tuami kum ma in Pastor
Khamzalian khut a Baptisma atang a, pindan a kiten toh athuo
ngal uhi. 1967 kum in Sialna Hattuum puasa ama lamkaina in tun
ding kia ahi. Tualeh 1969 kum in Muallum khuo a ana pmlut
a, Muallum a pat kum 1976 in Teikot ah pmlut kia in 1977 in
Teikot ah hattuum ana phutkhie hi. 1978 in Pastor Mangdal leh
Upa Liankhomang in mapuina in Teikot hattuum Upa dingin
a telching in a um a, tualeh 1980 kum in Muallum, Presbytery
khawmpi ah Upa Ordination ana tang hi. 1982 kum in pienthana
dihtah ang nei pan hi. Tualeh ginumtah a Pasian nna asepnah
Muallum LCC Chairman term thum ana puo a, District Chairman
term ni 2vei, ZTP Moderator term 1vei, ZTP treasurer tem 1 ana
puo hi. Tuachin kum 2017 March ha apat in lungtang natna nei
a tam bang hinkhuo ana mang zou in date 8/9/2018 (Kiginni)
zingkal lam 7:30 am in a muon Pasian kung ah ang na khawlsan
tahi. Ama it thu leh i suunthu tam i Khristian Tangkou deithaw
huoitah tungtawn in i puong uhi.

1. Gila ga goutan atate pasal 4 leh numei 3 anei hi.
2. Atute 11 leh tusawn 6 anei hi.
3. Aladei:
 - 1) Zion tate zalenna ni anaita. Latha No. 409
 - 2) Kei din sunni leh solkha tang nawnlou Latha No. 371

.....

ZPWF COLUMN

21st August to 24th September 2018 sung a Tunnu Limbel panpina pete:

1. PWF P.Suohzahau khuo Anntang taang	Rs. 1,450
2. PWF LDCC Hiangzou Anngtang Kg. 75 &	Rs. 500
3. PWF New Zoveng Anntang Kg. 75 &	Rs. 450
4. PWF Mawngken Anntang	Kg. 50
5. PWF Bohlui Anntang	Kg. 35
6. PWF Chingmang khuo Anntang	Kg. 30
7. Nu Luanngaimang, Hiangtamjang	Rs. 100
8. Pa H. Kapneithang, Central Church	Rs. 2,000
9. Nu Chingneikim, Central Church	Rs. 1,000
10. Nu Nousuanching, Central Church	Rs. 1,000
11. Nu Flora Hatnu, UK	Rs. 50,000
12. Nu Chingzaniang, Zomi Colony	Rs. 1,000
13. Nu Nianghat, Tuilaphai	Rs. 1,000
14. Upa Ginsuankhai, Tuining	Rs. 150
15. Sye Hauminthang, Nungshai	Rs. 100
16. Pu Michael Ginzasuan, Zomi Colony	Rs. 1,000
17. Pa Kamkhogin, Central Church	Rs. 200
18. Sye Goukhenmung, Muollum	Rs. 816
19. Nu Vunggouniang, T.Talnuam	Rs. 200
20. Nu Manniangngai, Lailamveng	Rs. 500
21. Nu Suonching, Zomi Colony	Rs. 100
22. Nu Dimneiching, Central Church	Rs. 1,000
23. Tv. T.Kamlallian, Manniang khuo	Rs. 500
24. Nu Hoinu, Lhangnem	Rs. 500
25. Pa Jacob Suankhanlian, Lailamveng	Rs. 500
26. Pa Jamkhopau, Central Church	Rs. 10,000
27. Upa Haumang, Singngat	Rs. 100
28. Pi Niangpi w/o Hausuanthang MDC	Rs. 1,000
29. Nu Nianglamnuam, Lailamveng	Rs. 350
30. Tv. Hanglianmung, Aina	Rs. 300
31. Tv. Thangmuansang, Aina	Rs. 300
32. Tv. Tunlalpaul, Aina	Rs. 320
33. Nh. Ruth Lamhatfel, Aina	Rs. 300
34. Nu Mannianching, Lailamveng	Rs. 500
35. Umesh Supplier Sweet 1 Packet	
36. Upa Thangginsuan, Lailamveng Sintex 500 litres	

Petu zousie Mangpa'n hing guolzawl zing taken.

Adihloute Office a suhdih theizing ahi.

PATRON MEMBER-TE

1. Upa Gouzamang	2. Pu Hav. Khamchinkhup	3. Pu Khamzalam	4. Pu Chinzasuan
5. (L) Upa Liansuanpau	6. Pu Khamchinthang	7. Pu S.Dalthang	8. Upa Kapkhanthang
9. Upa Langginmang	10. Upa S. Nangkhanlal	11. Pu S. Lamkthoang	12. Upa Dr. M. Lachinkhai
13. Upa Khamchinjam	14. (L) Upa D.K.Manlun	15. Upa Suankhanmang	16. (L) Upa Khupgou
17. Upa Chinkham	18. Upa Ngulchinkham	19. (L) Rev. V. Vungzalian	20. Rev. Retd. Kamkhosoi
21. Rev. Retd. Tualzachin	22. Rev. (Rtd.) H. Nengzaton	23. Rev. Awnkhankhup	24. Rev. Dr. Hangpi Manlun Zou
25. (L) Pu Tuanzapau	26. (L) Rev. Ginchinjam	27. (L) Rev. Khamzasuan	28. Upa T. Lamkthohawng
29. Upa Khaichinmang	30. Rev. Stephen Chinzathang	31. Pu Khupkhanmang	32. Pu Khaidohlian
33. (L) Hav. Khamzahang	34. Pi Vungzanuam	35. Pu T. Gouzadou	36. Upa Liensuonkap
37. Pi Zelkhochiin	38. Pi Hatkhanvung	39. (L) Pi Ngaihoiching	40. Pi Mankhannieng
41. Pu Goukhanmang	42. Pi Chingzalam	43. Pu S. Thianzakhai	44. Pi Kamkhanching
45. Pu Haukhanpau	46. Pu Tuallianmang	47. (L) Pu Dongkap	48. (L) Pi Chingkhanmang
49. Pi Donkhonian	50. Upa Henzakhup	51. (L) Pu Saichinpau	52. Pu Goumang
53. (L) Upa Khamkhanhang	54. Shie Laangkhanlal	55. Pu Khamkhanlun	56. Upa L. Tualkhanpau
57. Upa Jamsianmung	58. Upa Ginzadong	59. Pu Kaizathang	60. Pi Goizanuom
61. Pi Thangneivah	62. Pu Khamzathang	63. Pi Donchin	64. Upa Liankhanmang
65. Pu Hauchinlun	66. Pu T. S. Lal	67. Pi Goichiin	68. Pu T. Khupchinthang
69. Upa T. Kaizalam	70. Pu Paul Henkholal	71. (L) Pu Soikham	72. Rev. P.C. Manga
73. Rev. Khamchinkhai	74. Rev. Jamlianpau	75. Rev. Chinzapau	76. Rev. Retd. Kamkhozam
77. Upa (L) Chinpu	78. Pu Zamkhanthang	79. Pu Chinglen	80. Miss Chinhaunieng
81. Upa P. K. Soia	82. Pu Goukhai	83. Pi Niangkhanmang	84. Evan. Retd. G.L. Joshya
85. Pi S. Chingkhanmang	86. (L) Pu Vumchinkhup	87. Upa Khaihenthang	88. Upa T. C. Pau
89. Upa Nengchinkap	90. (L) Upa Jamkhongam	91. Upa HT Manga	92. Mrs. Vahkhohling
93. Pu Hauliankap	94. Pi Chinnu	95. (L) Upa Ngulzakhai	96. (L) Upa T. Gougin
97. Pu Ginsuanhau	98. Upa (L) Langminthang	99. (L) Rev. David K.Samte	100. Upa T.S.K. Samte
101. Upa S.K. Khama	102. Pu Jamkhopao	103. Pu Thathang Taihul	104. Pu Kamkhankap
105. Bhim Prasad Ghatani	106. Rev. M. Kapsuanthang	107. Nu Chingneikim	108. Rev. Khupkhansuan
109. Pi Mannuamching	110. Rev. Kaimuanlal	111. Upa Nengkhanlian	112. Nh. Deborah Zou
113. Pu T. Kuppa	114. Rev. (L) Mangsuanthang	115. (L) Pu Lamchinhou	116. Upa Pauchinlel
117. Nu Kimneihoi	118. Upa Kamgenpau	119. Nh. Niangsuannuam	120. Nu Ngaikhanvung
121. Pu P. Sanjiv Zou	122. Upa M. Kaichinkham	123. Upa T. Sianchinpau	124. Upa Sianzahau
125. Pu L. Thenkhosoi	126. Pu Kamsuanhang	127. Upa Th. Kaikholam	128. Upa Lunchinthang
129. Pu P. Tongthang Zou	130. H. Nehzamang	131. Pu Thangsuankhup	132. Upa M. Kamzadou
133. Pu Jamkholian Munluo	134. Pu Sianzakhai	135. Upa Thangginsuan	

LIFE MEMBER-TE

01. Upa (L) T. Khupkenpau	02. (L) Pu M. Ginzahau	03. (L) Pu Selzapau
04. Pu L.C. Pautungnung	05. (L) Pi Khamkhannieng	06. Pi Ngaiuom
07. Pu Chinsuanthang	08. Upa Shanti Kumar	09. Pu Kamkhohau
10. (L) Pu Khamkhohau	11. Upa Khamzathang	12. Upa Chinkhanthang
13. Pu Tongzathang	14. Pi Chiinneilam	15. Upa Kulthang
16. H/Sm. Upa Kaichinpau	17. Pi Niangzalam	18. Upa P. Doukholun

Undelivered

Please return to:

The Editor

KHRIŒTIAN TANGKOU
ZPCS Office, Zomi Colony
Churachandpur - 795 128
P.O. Box - 48, Manipur, India
Synod Office Telephone No. (03874) 235105
Website: zousynod.org | email:info@zousynod.org
zpcs@rediffmail.com/zousynod05@gmail.com

7a,
